

երկիրը անձամբ տեսած լինելու, կարելի չէ, մանաւանդ երբ ուշադրութեան չառնուին աղբիւրների մանրամասնութիւնները, ինչպէս եղել է այս դէպքում» :

Ահա ծանր ամբաստանութիւն, որից հետեւում է, թէ յօդուածի ճակատագրող motto, Բելիկի խօսքը, ուղղուած է մեր դէմ : Մեղապարտ ենք, ուրեմն, որ տեղադրութեան ծանօթ չենք, եւ աղբիւրների մանրամասնիքը անտես ենք արել : Ասել է, թէ այս երկու արատից դերձ է պ. Սաչատրեան, որ տեսել է երկիրը, ուսումնասիրել աշխարհագրական պայմանները, այլ եւ լիովին օգտակատել է պատմական աղբիւրները իրենց մանրամասնութեամբ :

Տեսնենք, որքան արդարացի են այս յայտարարութիւնները :

\* \* \*

Պրոկոպ յոյն պատմիչը յիշում է երկու աշխարհագրական կէտ, Bolon, որ միշտ կոչում է Phourion «բերդ», եւ Pharangion, որ երբեք չի կոչում բերդ : Առաջին, այսինքն՝ Բոլոնի համար ստում է, որ դանում է Թէոդոսուպոլի (որ է Կարին=Էրզրում) սահմաններին մօտիկ : Իսկ Փարանգիոն այն տեղն է, ուր կար ոսկեհանք, եւ շատ մօտ էր Վոհ կամ Ճորոխ գետի ակունքին :

Բոլոն բերդը ծանօթ է հայ մատենագրութեան : Սա այն բերդն է, որ Փարպեցին կոչում է Բողբերդ եւ դնում է Բասենում : Բասենը Կարինի թիկունքն է, եւ ուրեմն Պրոկոպ իրաւունք ունէր ասելու, որ Բոլոն բերդը Կարինի սահմաններին մօտ էր :

Փարանգիոնը անծանօթ է մեր մատենագրութեան, բայց Պրոկոպի այն ցուցումից, որ գտնուում էր Ճորոխի ակնքում, եւ որ յայտնի էր ոսկեհանքով, պարզ հետեւում է, որ խօսքը Սպերի շրջակայքում գտնուած ոսկեհանքի մասին է, որովհետեւ Ճորոխի ակունքը իրօք գտնուում է Սպերի առջեւ բարձրացող լեռների մէջ : Նոյն տեղն է Փարանգիոնը, ինչ որ Սարարոնի Կարալլա :

Լոյսի պէս պարզ է : Եւ այս ճշմարտութեան դէմ է ելնում պ. Սաչատրեան, առարկում է, հակասութիւններ է գտնում մեր խօսքերի մէջ, առանց նկատելու, որ հակասութեան աղբիւրն ինքն է, իր հիմնովին սխալ

հասկացողութիւնը, որով պատմիչի յիշած երկու տեղերը ձուլում է, կարծելով որ նրանք գտնուում են միեւնոյն տեղ իրար կից : Այս պատճառով էլ Փարանգիոնին է վերագրում, ինչ որ պատմիչն ասում է Բոլոնի մասին, եւ ընդհակառակը Բոլոնին է տալիս, ինչ որ վերաբերում է Փարանգիոնին :

Հիմնական սխալ, որ փոշի է դարձնում ոչ միայն նրա առարկութիւնները, այլ եւ ամբողջ ուսումնասիրութիւնը :

«Պրոկոպ Բող եւ Փարանգիոն միշտ «անբաժան» է յիշում, — դրում է պ. Սաչատրեան, — եւ որոշակի ստում թէ ոսկեհանքը գտնուում էր նրանց մօտ. Իսկ Աղոնց ոսկեհանքը դնում է Սպերի մօտ, ուստի չէր կարող Բասենի սահմանների վրայ գտնուել» :

Ո՛չ, պ. Սաչատրեան, Պրոկոպ այդ չէ ասում, այլ այն, որ ոսկեհանքը գտնուում է Փարանգիոն, իսկ Բող՝ Բասենում :

Տարբերութիւնը մեծ է :

Այս հանգամանքը զանց անելով պ. Սաչատրեան գտնում է, որ մեր տեղագրական բացատրութիւնը չէ նպաստում խնդրի լուծման : Երեսը դարձնում է մեղմից եւ առաջարկում դիմել Պրոկոպին, որ նրա տուած մանրամասնութիւնների միջոցով կարողանայ ճշդել ոսկեհանքի տեղը, քանի որ մեզ յանդիմանեց որ ուշադրութեան չենք առել մանրամասնութիւնները :

Արգոյ բանասէրը բերում է միտամի Պրոկոպի տեղեկութիւնները : Հետեւինք նրան : Գեղեցիկ առիթ է ծանօթանալու նաեւ նրա բանասիրական կարողութիւնների հետ :

Պրոկոպ ասում է ըստ Սաչատրեանի՝

1. Հոռոմները «պահանջեցին պարսկական մի քանի բերդեր Պարսկահայքում, որոնք են Բոլոնի բերդը եւ Փառանգիոն անուանուած բերդը որն այն տեղում է (!), ուր պարսիկները ոսկի են հանում, որը տանում են արքային» :

2. Իսահակ Կամսարականը «հոռոմներին յանձնեց Բոլոն բերդը, որը շատ մօտ էր գտնուում թէոդոսիուպոլի սահմանին» :

3. Պարսից քաղաւորը «պահանջում է որ հոռոմները պէտք է վերադարձնեն Փառանգիոն եւ Բոլոն բերդերը (!)» :